

Siunnersuut uunga: Imeruersaatit qiimmassaatinik akullit (energidrik) inunnut 18-it inorlugit ukiulinnut tuniniarnissaannik sassaalliutiginissaannillu inerteqquteqarneq, kiisalu imeruersaatit qiimmassaatinik akullit allagartalersorneqartarneri ussassaarutigineqartarnerilu pillugit Inatsisartut inatsisaat nr. xx, xx. xx 2012-imeersoq
(Naalakkersuisut)

Saqqummiussissut

(Peqqissutsimut Naalakkersuisoq, Agathe Fontain)

Siullermeerneqarnera

Naalakkersuisut sinnerlugit matumuuna saqqummiutissavara imeruersaatit qiimmassaatinik akullit tuniniarnissaannik sassaalliutiginissaannillu inerteqquteqarneq, kiisalu imeruersaatit qiimmassaatinik akullit allagartalersorneqartarneri ussassaarutigineqartarnerilu pillugit Inatsisartut inatsisissaattut sinnersuut.

2010-mi imeruersaatit qiimmassaatinik akullit pillugit oqallittoqangaatsiarpoq, angajoqqaat arlallit meeqqamik imeruersaatit qiimmassaatinik akulinnik imereernermik kingorna inuummarliornerannik misigisaqartarsimanerannut atatillugu.

UPA 2011/66-imi Inatsisartunut aalajangiiffigisassatut siunnersuut oqaluuserineqarpoq, tamatumani Naalakkersuisut malittarisassiornissamut peqquneqarlutik, taamaasilluni imeruersaatit qiimmassaatinik akulinnik meeqqanut 12-it inorlugit ukiulinnut nioqquteqarneq inerteqqutigineqalersinnaaqullugu. Tamatuma kingorna oqallinnermi allannguutissatut siunnersuutigineqarpoq imeruersaatit qiimmassaatinik akulinnik 18-it inorlugit ukiulinnut nioqquteqarnerup inerteqqutigineqalernissaa. Siunnersuutip Inatsisartunit oqallisigineqarnerani allannguutissatut siunnersuut taaneqartoq akuersissutigineqarpoq.

Inatsisartut inatsisissaattut siunnersuutikkut matumuuna siunnersuutigineqarpoq imeruersaatit qiimmassaatinik akulinnik 18-it inorlugit ukiulinnut nioqquteqarneq sassaallertarnerlu inerteqqutigineqassatut. Inatsisissatut siunnersuummi imeruersaatit qiimmassaatinik akullit nassuiarneqarput imertakkatut kaffip eqeernartuanik akulittut, tassani kaffip eqeernartortaanik akua tamarmiusoq liiterimut ataatsimut 150 mg sinnersimappagu. Meeqqat inuusuttullu uerinartunut sunulluunniit illersorniarlugit inatsit eqqunniarneqarpoq.

Imeruersaatit qiimmassaatinik akullit tassaagajupput imeruersaatit kulisyremik akullit, sukkullit, aammalu kaffip eqeernartuanik annertuumik akullit. Imeruersaatit kaffip eqeernartuanik akoqarnermikkut eqiiallannermik misigititsisarput. Ilanngullugu kaffip eqeernartua

uerinartuuvoq, tassanngaannartumillu pisarunnaaraanni malugineqarsinnaasarpuk ilaatigut niaqunnguneq aamma iliuutsit sivikitsumik allanngorneri.

Imeruersaatit qiimmassaatinik akullit ullumikkut meeqqani inuusuttunilu nuannarineqartorujussuupput, nalinginnaasumillu imipallanneqartarlutik imalu annertussuseqakkajuttumik, kaffip eqeernatua pisuulluni ikiaroortutut misigisitsisarluni. Kaffip eqeernartuanik annertuumik pinerup qarasaq qiteralillu sunnertarpai iluaallortitsisinnaallunilu, soorlu ukutserlunnermik, merianngunermik, niaqunngunermik, uummammik kassuttoornermik aamma nukinnik sajukulaartitsinermik kiisalu iliuutsit sivikitsumik allanngornerinik, soorlu eqqissiveerunnermik, uninngasinnaajunnaarnermik, annilaanganermik ersinermillu. Tamanna atuarfimmi angajoqqaanilu misigineqartarpoq, meeqqat imeruersaatink qiimmassaatinik akulinnik imereerneramik kingorna eqqissiveqarneq ajormata uniffeeruteqqasarlutillu ima annertutigisumik, avatangiisit ilikkarsinnaanerlu sunnerneqartarlutik.

Meeqqat inuusuttullu inersimasunut naleqqiullutik annikinneralaarsuarmik kaffip eqeernartuanik pivallaarnermikkut saniatigut sunniutipiloqartitsisinnaapput. Soorlu meeqqat inuusuttullu oqimaassusertik naapertorlugu agguaqatigiissillugu kiilumut ataatsimut ullormut 2,5 mg sinnerlugu kaffip eqeernartuanik pisariaqanngillat. Tassa imaappoq meeraq 40 kiilunik oqimaassuseqaruni annerpaamik ullormut kaffip eqeernartuanik 100 mg-imik pisartussaa-gualarpoq. Imaappoq imeruersaat qiimmassaatinik akulik qillertuusaqqamiittoq $\frac{1}{4}$ literi sinnilaanngualaaginnarlugu. Ilutigisaanik kaffip eqeernartuanik najooqqagassani allaniinnera pissutigalugu, soorlu kaffini, tiini, kakaoni sodavandinilu, meeqqat inuusuttullu kaffip eqeernartua ullormut pisinnaasaaminnut killigititaq sippupallassinnaavaat.

Siunnersuutikkut matumuuna Naalakkersuisut kissaatigaat innuttaasut peqqinnerulernissaat, tassunga ilanngullugu meeqqat inuusuttullu annertuumik kaffip eqeernartortalinnik imeruersaatinik qiimmassaatitalinnik imerneremikkut kaffip eqeernartuata pitsaanngitsumik sunniutigisartaagaanik eqqorneqarsinnaanerat pinaveersimatissallugu.

Taamatut oqaasertalerlugu siunnersuutip Inatsisartuni akuersaartumik oqaluuserineqarnissaanut tunniunneqarpoq.